

In mais da pais

Las lingias grassas e finas da l'avust 2020

DA DAVID TRUTTMANN/FMR


Il mais d'avust è stà in plazzal total! Da Disla enfin a Sta. Maria, dad Andeer enfin ad Alvaschagn. Ina survista.

Il plazzal numer 1 è stà senza dubi quel als Mulegns en Surses. E sco adina: Il capolavurer ha gè er als Mulegns in num talian: Giovanni! Il capo *Giovanni Netzer* ha numnamain orchestrà ses lavurers, donatur e chantadurs tras in veritabel spectacul. La Villa Alva ha'l mess en moviment, al traffic da transit ha'l dà dapli spazi ed al vitget ha'l dà ina nova perspectiva. E Giovanni na fiss betg Giovanni sch'el n'avess betg profità da l'attenziun mediala per gist preschentar ses proxim projectun en la regiun: in «campus cultural» a l'ur da Riom, inclusiv sala da teater e restaurant! 15 milliuns francs. Hai, hai, a quels Giovanni n'èsi betg da mussar co far ils «scavos» per novs plazzals.

In stop hai dà quest mais sin il plazzal da la via da meglieraziun tranter Disla e Madernal (Mustér). Ina gruppa da persunas privatas e d'organisaziuns per la protecziun da la patria ha reclamà che la via istorica vegnia destruida, v.d. che la via vegnia renovada en furma exagerada. Entant ha il chantun revocà ses stop, las lavurs pon cuntinuar tenor plan. Ils recurrents, tranter els il publicist *Köbi Gantenbein*, l'antieri derschader federal *Giusep Nay* e l'autur *Leo Tuor*, han fatg valair en lur protesta la valur istorica da quella via. Els han rendì attent che

gia imperatur, papas ed armadas hajan transì quella via: Napoleon, Barbarossa e papa Benedetg il tschintgavel. Quai è segir e franc correct. Però sch'ins stuess bajegiar ora quella via tranter Disla e Madernal per ils basegns da quellas signurias dad ozendi, cun lur papamobils, lur SUV's e cun lur panzers, alura duvrassi intervenziuns blier pli grondas a Disla.

La cumplet'administraziun chantunala è quests dis in veritabel plazzal. Igl è perfin grev da cuntanscher per telefon in u l'auter uffizi perquai ch'ils emploiads e las emploiadas dal chantun èn vidlonder a far midada en lur novs biros da la «Sinergia». Tut ils biros vegnan ad esser plain stgatlus da bananas. Damai – nus essan ina republica da bananas.



ILLUSTRAZIUN JON BISCHOFF

Ils deputads e las deputadas sur-silvanas han inoltrà quest mais in manifest per avrir novs plazzals en Surselva, v.d. plazzals per meglras colliaziuns, vias e sviaments. In'idea inoltrada para spezialmain interessanta, quella da metter il sviament da Glion sut terra, in sviament che separa oz la citad. Buccas nauschas manegian che quai fiss propi ina grondiusa soluziun: Tgi che passa Glion na stuess betg pli guardar sin questa «bellezza» citad a la riva dal Rain.

ASta. Maria giavischass la populaziun finalmain in plazzal. Gia onns ed onns spetga la vischnanca sin in sviament, il traffic da transit crescha. Damai gida mo pli ina chaussa en il vitg reformà da Sta. Maria: Guardar vers il tschiel ed urar tar sontga Maria.

Apropos catolic e reformà: Sa chapescha fiss ina fusiun da PCD e PBD er in interessant plazzal. Però il mument manca anc in plan e nagin n'ha propi il curaschi da prender per mauns sco emprim in palpìri, in meter ed in rispli – u il gummi per stritgar il C.

Ils dad Andeer han decidì da dar ten dretg da bajegiar il terren per construir sper l'autostrada ina baselgia, creada tenor ils plans dals architects Herzog & de Meuron. Nus cussegliain: Be dai cun quest plazzal! Construir! Immediat! E sch'in bel di stuess vegnir schlargiada l'autostrada, forse perquai ch'in papa stuess passar cun ses papa-mobil, alura savessan nus dad in capolavu-

rer che pudess spustar l'entir'istorgia: Giovanni dals Mulegns.

Quest mais hai dà anc auters plazzals en l'univers rumantsch: A Sent èn ruts ils zains dal clutger pervi dad in chametg. Giovanni, gida! L'elecziun dad in nov uvestg da Cuira è in plazzal etern. Sch'igl è uschè grev da chattar in um competent per quel post, e sche Giovanni na vul propi betg siglir en, valesi forse la paina da tschertgar ina dunna. Ed ad Alvaschagn avessi da dar sut la batgetta da l'artist indigen *Mirko Baselgia* in nov plazzal per art e cultura en l'antieriura chasa da scola. Uschia èsi oramai: Sch'ina dat betg pli avunda uffants e la populaziun tschessa, alura sto la cultura vegnir en acziun. Navair, Giovanni?

Ed apropos plazzals: La FMR ha anc adina inserà diversas plazzas redacziunalas en il Grischun central ed en Engiadina. Be curaschi!

In mais da pais

(fmr/dat) Tgeninas èn stadas las lingias grassas e finas dal mais passà en Rumantschia, en Grischun ed in-summa? Quai ans dumandain nus da la FMR mintga fin dal mais. Tge paisa e tge paisa mo in zichel? Nus laschain repassar schabetgs, dain ina survista casuala e commentain quai cun in surrir. Mais per mais illustrescha il Bregagliot rumantsch *Jon Bischoff* il «Mais da pais» cun in «schurnal grafic».